



UDC: 343.7(045)(575.2)

# O'ZGALAR MULKINI TALON-TOROJ QILISH TUSHUNCHASI VA UNING BELGILARI

**Taxirov Farhod,**

O'zbekiston Respublikasi Jamoat xavfsizligi universiteti  
professori, yuridik fanlar doktori  
ORCID: 0000-0002-1290-3739  
e-mail: tft@mail.ru

**Annotatsiya.** Ushbu maqolada o'zgalar mulkini talon-toroj qilish tushunchasi va uning belgilariga doir masalalar tahlil etilgan. Olimlarning bu boradagi fikr va mulohazalari o'rganilib, mazkur tushuncha bilan bog'liq masalalarni takomillashtirish yuzasidan taklif va tavsiyalar berilgan. Shuningdek, maqolada talon-toroj qilishning bosqinchilik, talonchilik, firibgarlik va o'g'irlik kabi shakllariga nisbatan olish, olib qo'yish so'zlarini qo'llash mumkinligi, lekin tovlamachilik va o'zlashtirish yoki rastrata yo'li bilan talon-toroj qilishga nisbatan qo'llab bo'lmasligi haqidagi fikrlar bayon etilgan. Chunki tovlamachilik jabrlanuvchini o'z mulki yoki mulkka bo'lgan huquqini berishga majbur qiladigan sharoitga solib qo'yish, rastrata esa aybdor mulkni olmasdan turib, birdaniga boshqalarga berib yuborish orqali ham sodir etilishi mumkin. O'zlashtirish yoki rastratada mulkdor tomonidan mulk aybdorga ishonib topshirib qo'yilganligi uchun aybdor o'zidagi mulkni o'zi olib qo'ya olmaydi, biroq uni mulkdor boshqaruvdan qonunga xilof ravishda chiqarishi hamda o'z foydasiga (o'zlashtirishda) yoki boshqa shaxslar foydasiga (rastratada) qaratishi mumkin. Maqolada talon-toroj qilingan mulk qiymatining qisman to'lanishi talon-toroj tarkibi mavjudligini istisno etmasligi borasida ham fikrlar keltirilgan.

**Kalit so'zlar:** o'zgalar mulki, talon-toroj, jinoyat, jazo, javobgarlik, mulk, o'zlashtirish, rastrata, o'rnini qoplamaslik, zarar.

## ПОНЯТИЕ ХИЩЕНИЯ ЧУЖОГО ИМУЩЕСТВА И ЕГО ПРИЗНАКИ

**Тахиров Фарход,**

доктор юридических наук, профессор  
Университета общественной безопасности  
Республики Узбекистан

**Аннотация.** В данной статье анализируются понятия хищения чужого имущества и его признаки. Кроме того, в статье анализируются взгляды ученых на понятие и признаки мародерства, даются предложения и рекомендации по совершенствованию понятия. В данной статье автор считает, что слова «брать», «отнимать» можно употреблять по отношению к таким формам

хищения, как разбой, грабеж, мошенничество и кража, но их использование некорректно по отношению к вымогательству и растрате. Это связано с тем, что вымогательство может быть совершено и путем постановки потерпевшего в положение, вынуждающее его отказаться от своего имущества или имущественных прав, а растрата – путем внезапной передачи виновным имущества другим лицам без его взятия. Так, собственник вверил имущество виновному в присвоении или растрате, поэтому виновный не может сам забрать имущество, но может незаконно вывести его из-под контроля собственника и использовать в своих целях (при присвоении) или в интересах других лиц (растрата). В статье также утверждается, что частичное возмещение стоимости награбленного имущества не исключает существования признака мародерства.

**Ключевые слова:** чужое имущество, разбой, преступление, наказание, ответственность, имущество, хищение, растрата, невозмещение, ущерб.

## THE CONCEPT OF THEFT OF ANOTHER'S PROPERTY AND ITS FEATURES

**Takhirov Farhod,**

Professor of the University of Public Security  
of the Republic of Uzbekistan, DSc

**Abstract.** This article analyzes the concept of theft of other people's property. Analyzing the views of researchers on the concept and signs of theft, suggestions and recommendations for improving the concept are provided. Moreover, according to the article, the words "to take", "to take away" can be used for the types of theft such as robbery, stealing, fraud, or larceny; but for extortion and embezzlement, it is not suitable to use these words. Because extortion can be committed by putting the victim in a situation that forces him to give up his property or the right to property, and embezzlement can be committed by giving the property to others without taking it. The owner entrusts the property to the perpetrator of misappropriation or embezzlement, therefore the perpetrator cannot take the property himself, but he can illegally take it out of the control of the owner and use it for his own purposes (in case of appropriation) or in the interests of other persons (embezzlement). The article also argues that partial reimbursement of the value of the stolen property does not exclude the existence of a sign of theft.

**Keywords:** someone else's property, robbery, crime, punishment, liability, property, theft, embezzlement, non-compensation, damage.

### Kirish

Mulk hamda mulkiy huquq alohida e'tiborga molik bo'lganligi uchun ham kishilik jamiyati rivojining barcha bosqichlarida uning muhofazasi muhim hisoblanadi. Shu sababdan mulk huquqi va mulkiy munosabatlar har bir davrda nafaqat huquqiy,

balki siyosiy, iqtisodiy va ijtimoiy mazmun kasb etgan. Tarixan mulk hamda mulkiy huquq rivoji insoniyat rivojiga uzviy bog'liq holda kechgan. Negaki hamma zamon va makonlarda jamiyatning evolyutsion va revolyutsion taraqqiyotida mulk ijtimoiy mavqeni belgilashning asosiy vositalaridan biri sanalgan. Mulk – bu huquqning eng ustuvor qadriyati. Jinoyat qonunining asosiy vazifalaridan biri esa mulk huquqining daxlsizligini ta'minlash hisoblanadi.

O'zbekiston Respublikasi Konstitutsiyasining 53-moddasida bozor munosabatlarini rivojlantirishga qaratilgan O'zbekiston iqtisodiyotining negizini xilma-xil shakldagi mulk tashkil etishi, davlat barcha mulk shakllarining teng huquqliligi va huquqiy jihatdan teng muhofaza etilishini kafolatlashi belgilab qo'yilgan. Globallashuv sharoitida mamlakatimizda ijtimoiy munosabatlarning keskin rivojlanishi o'zgalar mulkini talon-toraj qilish jinoyatlarining shakli va turlarining kengayishiga sabab bo'lmoqda.

### **Material va metodlar**

Tadqiqotning maqsadi o'zgalar mulkini talon-toraj qilish eng ko'p sodir etiladigan jinoyatlardan biri bo'lib, Jinoyat qonuniga binoan, o'zganing mulkini talon-toraj qilish mulkka qarshi jinoyatlarning xavflisi hisoblanadi, ammo amaldagi qonunda "talon-toraj" tushunchasi berilmagani uchun mazkur tushunchaga mualliflik ta'rifi berish, shuningdek, mavzu yuzasidan olimlarning fikr va mulohazalari tahlil qilinib, tegishli taklif va tavsiyalar berishdan iboratdir.

Mazkur ilmiy maqolani tadqiq etishda umumilmiy uslublar: funksional yondashuv, mantiqiylik, tizimlilik, tarixiy, qiyosiy-huquqiy, statistik, sotsiologik so'rovlar o'tkazish kabi metodlardan foydalanilgan.

### **Tadqiqot natijalari**

O'zgalar mulkini talon-toraj qilish tushunchasi va uning belgilariga doir masalalar respublikamizda Q.R. Abdurasulova, R. Kabulov, B.J. Axrarov, R.A. Zufarov, M.H. Rustambayev, F. Taxiroy, A.G. Zakirova, Sh.Yo. Abduqodirov, N.S. Salayev, U.M. Mirzayev, T.X. Hasanov, H.R. Ochilov va boshqalarning ilmiy ishlarida o'rganilgan. MDHga a'zo davlatlar olimlaridan esa A. Arxipov, I.A. Musyal, V.A. Maslov, A.A. Borovkov, S.M. Mkrtchyan, I.A. Volkova, N.A. Lopashenko, M.F. Musaelyan, G.K. Smirnov va boshqalar tomonidan tadqiq etilgan.

Biroq yuqorida nomlari keltirilgan olimlarning ilmiy ishlarida o'zgalar mulkini talon-toraj qilish tushunchasi jinoyat-huquqiy va kriminologik jihatdan kompleks tarzda tadqiq etilmagan. Shu munosabat bilan tadqiqotimiz mazkur turdagi jinoyatning jinoyat-huquqiy va kriminologik jihatlarini o'rganish bilan bog'liq qonunchilik bazasini takomillashtirishga xizmat qiladi.

### **Tadqiqot natijalari tahlili**

Talon-toraj so'zi "talon" va forsha "toraj" so'zlaridan tashkil topgan bo'lib, "hamma yoqdan tortqilash", "o'zlashtirish" kabi ma'nolarni anglatadi [1, 651-b.]. Talon-toraj so'zi rus tilidagi "хищничество" so'zining tarjimasi bo'lib, o'zbek tilida "vahshiylik, qonxo'rlik, talonchilik, o'ta isrofgarchilik" kabi ma'nolari bor [2, 685-b.].

Yuridik mazmunda "talon-toraj"ga ta'rif bergan huquqshunos olimlar uning o'zga shaxs mulkining qiymatiga ekvivalent sifatida pul shaklida yoki o'z mehnati bilan

yoxud o'rniga qiymati teng keladigan boshqa tovar-moddiy boyliklarni bermaslikni anglatadigan belgisini ifodalashda turli, ya'ni bepul [3, 201-b.], o'rnini qoplamasdan [4, 53-b.], haqini to'lamasdan [5, 379-b.] degan iboralarni ishlatishgan.

"Tekin", "bepul", "haqini to'lamaslik" so'zlari o'zganing mulkini uning haqini to'lamasdan olishni anglatadi. O'rnini qoplamaslik ularga nisbatan kengroq ma'noga ega va u nafaqat pul shaklida, balki o'z mehnati bilan yoki o'rniga qiymati teng keladigan boshqa tovar-moddiy boyliklarni bermaslik ma'nolarini ham bildiradi. Shu sababdan ham, bizningcha, talon-torajning mazkur belgisini ifodalashda o'rnini qoplamaslik iborasini ishlatish maqsadga muvofiq.

"O'rnini qoplamaslik" aybdorning o'zganing mulkini o'zi yoki boshqa shaxslarning foydasiga mulkdorga mulkning haqini to'lamay, xarajat qilmay, bepul, tekinga olib qo'yishini anglatadi. O'rnini qoplamaslik esa mulk qiymatining ekvivalenti sifatida pul yoki o'z mehnatini yoxud o'rniga qiymati teng keladigan boshqa tovar-moddiy boyliklarni bermaslikda ifodalanadi.

Talon-toraj qilingan mulkning qiymatini qisman to'lash talon-toraj tarkibi mavjudligini istisno etmaydi, u faqat mulkdorga yetkazilgan zarar miqdoriga ta'sir ko'rsatadi. O'zlashtirilgan yoki rastrata qilingan mol-mulkning qoplanmagan qismi miqdori bo'yicha talon-toraj sodir etilgan, deb hisoblanishi lozim.

E'tiborli jihati shundaki, agarda mulkdor mulki haqi to'langan, o'rni qoplangan holda olingan bo'lsa, aybdorning harakatlarida talon-torajning tarkibi mavjud bo'lmaydi. Lekin aybdorning harakatlari ish holatlariga ko'ra o'zboshimchalik (JK 229-moddasi) sifatida kvalifikatsiya qilinishi mumkin.

Ayrim olimlar talon-torajga umumiy ta'rif berishda bu jinoyatlarni sodir etishdagi aybning shaklini ko'rsatish kerak emas, deb hisoblaydi. Jumladan, A.P. Sevryukovning fikricha, talon-toraj ehtiyotsizlikdan sodir etilmasligi tufayli talon-toraj tushunchasida uning qasddan sodir etilishini ko'rsatish shart emas [6, 24-b.].

Talon-torajning yana bir belgisini ifodalashda turlicha, ya'ni talon-torajning huquqqa xilof [7, 53-b.], noqonuniy [8, 10-b.], g'ayriqonuniy [9, 8-b.] ravishda sodir etilishi ko'rsatiladi. Bularning barchasi talon-toraj sodir etilishi bilan mulkdorning o'z mulkiga egalik qilish, foydalanish va uni tasarruf etish huquqlarini qonun bilan bevosita taqiqlangan usullar bilan buzishda ifodalanadi.

O'zlashtirish yoki rastrata yo'li bilan talon-toraj qilishda qonunga xiloflik mulkdorning o'z mulkiga egalik qilish, foydalanish va uni tasarruf qilish huquqini qonun bilan bevosita taqiqlangan usullar bilan buzishda ifodalanadi.

Huquqshunos olim A.V. Shulga o'zganing mulkini talon-toraj qilishda qonunga xiloflik ma'lum bir mulkni o'zlashtirish bilan kuzatiladigan, mulkdorning mulkka nisbatan bo'lgan vakolatlarini jinoyat qonuni bilan taqiqlangan usulda o'zlashtirishni o'zida ifoda etishini [10, 7-8-b.] tushuntiradi. Bizning fikrimizcha, mulkdorning o'z mulkiga egalik qilish, foydalanish va tasarruf etish huquqini o'zlashtirish imkonsiz. Biroq uning ishonchiga kirib, mulkdorning o'z mulkiga egaligini yo'qotmagani holda egalik qilish, foydalanish, tasarruf qilish imkoniyatini berganidan foydalanib, aybdor mulk egasini o'z mulkning taqdirini mustaqil belgilash imkoniyatidan mahrum etishi mumkin.



Talon-torajning bosqinchilik, talonchilik, firibgarlik va o'g'irlik kabi shakllariga nisbatan olish, olib qo'yish so'zlarini qo'llash mumkin, lekin tovlamachilik va o'zlashtirish yoki rastrata yo'li bilan talon-toraj qilishga nisbatan qo'llab bo'lmaydi. Chunki tovlamachilik jabrlanuvchini o'z mulki yoki mulkka bo'lgan huquqini berishga majbur qiladigan sharoitga solib qo'yish, rastrata esa aybdor mulkni olmasdan turib, birdaniga boshqalarga berib yuborish orqali ham sodir etilishi mumkin. O'zlashtirish yoki rastratada mulkdor tomonidan mulk aybdorga ishonib topshirib qo'yilganligi uchun aybdor o'zidagi mulkni o'zi olib qo'ya olmaydi, biroq uni mulkdor boshqaruvidan qonunga xilof ravishda chiqarishi hamda o'z foydasiga (o'zlashtirishda) yoki boshqa shaxslar foydasiga (rastratada) qaratishi mumkin.

Ko'pgina olimlar talon-torajning bir shakli sifatida o'zlashtirishni ham keltirib o'tadi. Bitiruv malakaviy ishini yozish jarayonida bu borada fikr bildirgan olimlar ilmiy qarashlarini o'rganganimizda, jumladan, quyidagilarni kuzatdik. Masalan, Yu.I. Lyapunov o'zlashtirishni moddiy qimmatliklarni olib qo'yish va uni aybdor foydasiga qaratish deb baholaydi [11, 354-b.]. S.V. Sklyarov esa uning fikriga qarshi o'laroq, o'zlashtirish va rastrata uchun xos belgi olib qo'yish emas, balki mulkni o'zi yoki boshqa shaxslarning manfaatlariga qaratish bo'lib, aybdor bu vaziyatda bir vaqtning o'zida ham talon-toraj qilish jinoyati subyekti, ham talon-toraj qaratilgan mol-mulkning "qonuniy egasi" hisoblanishini [12, 53-b.] ta'kidlaydi. I.A. Klepitskiy va A. Bezverxovlar ham talon-torajni mulkni olib qo'yishsiz, aybdorning o'zi yoki o'zgalar foydasiga qaratish yo'li bilan ham amalga oshirilishi mumkinligini tushuntiradi [13, 14-b.].

Biz mazkur fikrlarni o'rganish asosida S.V.Sklyarovning o'zlashtirish va rastrata uchun xos belgi olib qo'yish emas, balki mulkni o'zi yoki boshqa shaxslarning manfaatlariga qaratish bo'lib, aybdor bu vaziyatda bir vaqtning o'zida ham talon-toraj qilish jinoyati subyekti, ham talon-toraj qaratilgan mol-mulkning "qonuniy egasi" hisoblanishi haqidagi fikriga qo'shilish lozim, deb o'ylaymiz.

O'rganishlar shuni ko'rsatadiki, "talon-toraj" tushunchasi – bu o'zgalar mulkini o'z foydasi yoki boshqa shaxslar foydasiga qonunga xilof tarzda va bepul olib qo'yish" ekanligi to'g'risidagi fikrlar ko'p uchraydi.

Shuningdek, talon-torajning quyidagi belgilari mavjud:

- o'zgalar mulkiga tajovuz qilish;
- shaxsning o'z foydasi yoki boshqa shaxs foydasiga sodir etish;
- mulkni qonunga xilof tarzda va bepul olib qo'yish.

Yuridik ensiklopediyalarda talon-toraj qilishga – o'zganing mulkini o'zining yoki boshqa shaxslarning foydasi uchun, mulkdor yoki ushbu mulkning boshqa egasiga zarar yetkazib, qonunga xilof tarzda va haq to'lamay olib qo'yish [15, 442-b.], degan ta'rif berilgan. Mazkur ta'riflarda talon-torajning keyingi belgisi, ya'ni uning mulkdor yoki ushbu mulkning boshqa egasiga zarar yetkazgan holda sodir etilishi ko'rsatilgan. R. Kabulov tomonidan talon-torajning mulkdorga moddiy zarar yetkazib sodir etilishi belgisi ham qayd etilgan.

Sh. Abduqodirov va U. Mirzayevlarning fikriga ko'ra, talon-toraj deganda, o'zganing mulki yoki mulkiy huquqini qonunga xilof ravishda o'zi yoki uchinchi shaxs foydasiga

qasddan, g'araz niyatda, qaytarib bermaslik sharti bilan, haqini to'lamasdan egallash tushuniladi [16, 5-b.].

Ya'ni mazkur ta'rifda talon-torajning yana uchta belgisi – uning qasddan, g'arazli niyatda va qaytarib bermaslik sharti bilan sodir etilishi nazarda tutiladi. E. Hakimov esa talon-torajning past niyatda sodir etilishi belgisini qo'shimcha qiladi, ya'ni uning fikricha, "talon-toraj – bu mulkdorlarga tegishli, ya'ni o'zganing mulkini past niyatda aybdor yoki boshqa shaxslar foydasiga g'arazli maqsadda ishlatish uchun g'ayriqonuniy va bepul olib qo'yish"dan iborat. Bunda muallif talon-torajni aynan "g'arazli maqsadda ishlatish uchun" mol-mulkni olib qo'yish jihatiga urg'u beradi. Bizningcha, mulkni past niyatda egallaganlik talon-toraj belgisi ekanligi haqidagi fikr ancha munozarali.

P. Bakunov talon-toraj qilish – o'zganing mulki yoki mulkiy huquqlarini qasddan, qonunga xilof ravishda g'araz niyatlarda, qaytarib bermaslik maqsadida mulk egasi yoki mulk uchun javobgar shaxs yoki mulkning g'ayriqonuniy egallanishiga to'sqinlik qilgan shaxsga zo'rlik ishlatib, zo'rlik ishlatish bilan qo'rqitib yoki zo'rlik ishlatmasdan, yashirin ravishda aybdorning o'z ixtiyori yoki boshqaning ixtiyoriga olinishi, deb tushuntiradi. Mazkur ta'rif talon-toraj bilan bog'liq barcha jinoyat belgilarini umumlashtirgan holda berilgan.

### **Xulosalar**

Xulosa o'rnida shuni aytish mumkinki, yuqorida keltirilgan ta'riflar asosida talon-torajning quyidagi belgilarini ajratish mumkin:

- talon-toraj o'zganing mol-mulki yoki mulkiy huquqlariga nisbatan amalga oshiriladi;
- o'zganing mol-mulkini olib qo'yish va aybdor yoki boshqa shaxslarning mulkiga aylantirish orqali sodir etiladi;
- talon-toraj qonunga xilof ravishda amalga oshiriladi;
- mol-mulk tekinga olib qo'yiladi;
- qilmish natijasida mulkdor yoki mazkur mol-mulkning boshqa egasiga zarar yetkaziladi;
- talon-toraj qasddan, g'arazli maqsadda sodir etiladi.

Olimlarning qarashlarini o'rganib, "talon-toraj" deganda, "o'zganing mulkini g'ayriqonuniy yo'l bilan jinoyatchining o'zi yoki uchinchi shaxsga qaytarmaslik sharti bilan haq to'lamasdan egallash", degan ta'rifni berishni lozim topdik.

O'zgarlar mulkini talon-toraj qilishning mazkur umumiy ta'rifi qonun chiqaruvchi tomonidan qabul qilinishi va JK Maxsus qismi 8-bo'limi – "Atamalarning huquqiy ma'nosi"ga kiritilishi maqsadga muvofiq.

### **REFERENCES**

1. O'zbek tilining izohli lug'ati [An explanatory dictionary of the Uzbek language]. Eds T. Mirzaev et al. Institute of Language and Literature of the Academy of Sciences of the Republic of Uzbekistan]. Tashkent, National Encyclopedia of Uzbekistan, 2006, iss. 3, N-Order, p. 651.



2. Ruscha-o'zbekcha lug'at [Russian-Uzbek dictionary]. Tashkent, O'qituvchi, 2004, p. 685.

3. Hakimov I. "Talon-toraj"ning umumiy tushunchasi va uning huquqiy oqibati [The general concept of "robbery" and its legal consequences]. Proceedings of the scientific-practical conference on the basics of economics and the problems of combating crime related to economic activity (criminal law and criminological aspects). Tashkent, TSU 2003, p. 201.

4. Qobulov R. Mulkni talon-taraj qilish nima? [What is property robbery?]. *Hayot va qonun – Life and law*, Tashkent, 1996, no. 10-11, p. 53.

5. Rustamboyev M.X. O'zbekiston Respublikasi Jinoyat kodeksiga sharhlar [Comments on the Criminal Code of the Republic of Uzbekistan]. Spec. section. – Tashkent, MIA Academy, 2016, p. 217.

6. Sevryukov A.P. Khishcheniye imushchestva: kriminologicheskiye i ugolovno-pravovyye aspekty [Theft of property: criminological and criminal law aspects]. Moscow, Examen, 2004, p. 24.

7. Rustambaev M.H. Comments on the Criminal Code of the Republic of Uzbekistan. Spec. section. Tashkent, Legal literature publish, 2021, 379 p.

8. Allabergenov A.P. Otvetstvennost' za khishcheniye, sovershennoye putem zloupotrebleniya sluzhebnyy polozheniyem [Liability for theft committed by abuse of official position]. Tashkent, TSU, 1984, p. 10.

9. Niyozova S.S. O'zgalar mulkini ishtirokchilikda talon-toraj qilganlik uchun jinoiy javobgarlik muammolari [Problems of criminal liability for participatory robbery of other people's property]. Tashkent, TSIL, 2007, p. 8.

10. Shul'ga A.V. Prisvoyeniye ili rastrata v usloviyakh stanovleniya rynochnykh otnosheniy [Assignment or waste in the conditions of the formation of market relations]. Ed. P.P. Galiakbarov. Krasnodar, Kuban State Agrarian University, 2004, pp. 7-8.

11. Lyapunov Yu.I. Kommentariy k Ugolovnomu kodeksu Rossiyskoy Federatsii [Commentary on the Criminal Code of the Russian Federation]. Moscow, 2006, p. 354.

12. Sklyarov S.V. Ugolvnaya otvetstvennost' za khishcheniye nedvizhimogo imushchestva [Criminal liability for the embezzlement of real estate]. *Rossiyskaya yustitsiya – Russian justice*, Moscow, 2001, no. 6, p. 53.

13. Klepitskiy I.A. «Vverennoye imushchestvo» v ugolovnom prave ["Entrusted property" in criminal law]. *Zakonnost' – Legitimacy*, Moscow, 1995, no. 12, p. 14.

14. Bezverkhov A. Nekotoryye voprosy kvalifikatsii prisvoyeniya ili rastraty [Some questions of qualifying misappropriation or embezzlement]. *Criminal law*. – Moscow, 2008, no. 4, p. 5.

15. O'zbekiston yuridik ensiklopediyasi [Encyclopedia of Law of Uzbekistan]. Ed. N. Toychiev. Tashkent, Adolat, 2011, p. 442.

16. Abduqodirov Sh., Mirzayev U. O'zgalar mulkini talon-toraj qilish [Looting other people's property]. Criminal Code Special Part Comments on Chapter X. Tashkent, TSIL, 2011, p. 5.

# KRIMINOLOGIYA VA JINOIY ODIL SUDLOV

ILMIY-AMALIY JURNAL

2-3 / 2022

**MUASSIS: TOSHKENT DAVLAT YURIDIK UNIVERSITETI**

**BOSH MUHARRIR:**

Q. Abdurasulova

Toshkent davlat yuridik universiteti "Jinoyat huquqi, kriminologiya va korrupsiyaga qarshi kurashish" kafedrası professori, yuridik fanlar doktori

**BOSH MUHARRIR:**

Y. Kolenko

O'zbekiston Respublikasi Bosh prokuraturasi Akademiyasi boshlig'i

**BOSH MUHARRIR O'RINBOSARI**

N. Salayev

Toshkent davlat yuridik universiteti Jinoyat huquqi, kriminologiya va korrupsiyaga qarshi kurashish kafedrası professori, yuridik fanlar doktori.

**Mas'ul muharrir:** K. Hakimov

**Muharrirlar:** Y. Yarmolik, Sh. Yusupova, F. Muhammadiyeva

**Musahhih:** M. Patillayeva

**Texnik muharrirlar:** U. Sapayev, D. Rajapov

**Tahririyat manzili:**

100047. Toshkent shahar, Sayilgoh ko'chasi, 35.

**Tel.:** (0371) 233-66-36, 233-41-09.

**Faks:** (0371) 233-37-48.

**Web-sayt:** [www.tsul.uz](http://www.tsul.uz)

**E-mail:** [lawjournal@tsul.uz](mailto:lawjournal@tsul.uz)

**Obuna indeksi:** 1386.

Jurnal 2022-yil 27-sentabrda tipografiyaga topshirildi.

Qog'oz bichimi: A4.

Shartli b.t. 11,39. Adadi: 100. Buyurtma: №.

TDYU tipografiyasida chop etildi.

ISSN 2181-2179

© Toshkent davlat yuridik universiteti